

VENDIM
Nr. 267, datë 12.4.2012

**PËR LLOJET DHE MËNYRËN E SHKËMBIMIT E TË PËRPUNIMIT TË INFORMACIONIT E TË
TË DHËNAVE STATISTIKORE TË KËRKUARA NGA ASHMDF-JA E NGA STRUKTURAT
SHTETËRORE PËRGJEGJËSE, NË NIVEL QENDROR DHE VENDOR**

Në mbështetje të nenit 100 të Kushtetutës dhe të pikës 3 të nenit 37 të ligjit nr. 10 347, datë 4.11.2010 “Për mbrojtjen e të drejtave të fëmijës”, me propozimin e Ministrit të Punës, Çështjeve Sociale dhe Shanseve të Barabarta, Këshilli i Ministrave

VENDOSI:

1. Monitorimi i treguesve të mbrojtjes së të drejtave të fëmijës realizohet në nivel, qendror dhe vendor, me qëllim mundësimin e të dhënave për hartimin e rekomandimeve dhe të politikave për mbështetjen e programeve të mbrojtjes së të drejtave të fëmijës.

2. Ministritë e linjës/institucionet qendrore i dërgojnë Agjencisë Shtetërore për Mbrojtjen e të Drejtave të Fëmijës (ASHMDF) të dhënat statistikore të mbledhura dhe të përpunuara, bazuar në formularët që i bashkëlidhen këtij vendimi dhe periodicitetit të përcaktuar në to.

3. Strukturat vartëse të ministrive të linjës, në nivel vendor, i dërgojnë njësisë për të drejtat e fëmijës në qark, të dhënat statistikore për rajonin, bazuar në formularët, që i bashkëlidhen këtij vendimi dhe periodicitetit të përcaktuar në to. Njësia për të drejtat e fëmijës në qark përpunon të dhënat e të gjitha institucioneve në nivel vendor dhe, brenda muajit pasardhës, ia dërgon ASHMDF-së.

4. Instituti i Statistikës (INSTAT), me kërkesë të ASHMDF-së, i dërgon kësaj të fundit të dhënat statistikore, të përcaktuara në formularët që i bashkëlidhen këtij vendimi.

5. ASHMDF-ja mbledh dhe përpunon të dhënat statistikore, të dërguara nga strukturat dhe institucionet e parashikuara në pikat 2, 3 dhe 4 të këtij vendimi dhe, pasi i vlerëson, harton raporte periodike për realizimin e qëllimeve të parashikuara në pikën 1 të këtij vendimi, me synim përmirësimin e respektimit të mbrojtjes së të drejtave të fëmijës.

6. Agjencia Shtetërore për Mbrojtjen e të Drejtave të Fëmijës dërgon pranë sektorit të statistikës të Ministrisë së Punës, Çështjeve Sociale dhe Shanseve të Barabarta të dhënat e mbledhura.

7. Ngarkohet Agjencia Shtetërore për Mbrojtjen e të Drejtave të Fëmijës për mbikëqyrjen e zbatimit të këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha